

richa di ducati 60 milia. Combateno tre di e tre note; alfine gitavano stagni in verga per difendersi, et si deno salvo le persone; dove, mesi in terra el patron et 5 altri in Sardegna, salvo el vero, e promisse mandar li altri per salvo modo da Zerbi; et cussi con victoria partino, et in Tunis si dize sono. Nostro Signor ristori i perdenti! D'altra parte, più di l'ultima non è innovato. Nostro Signor exalti Vostra Serenità! etc. Et uno galion venuto da Ligorne e Piombin, parti da tre zorni, ozi qui è arrivato. Ha nova le 9 galie da Napoli con una barza esser passate sopra Monte Arzentaro, et le do galie dil Papa ritrovarsi in canal di Piombin. Tutti stimano vadino in Cathelogna; dil successo, Vostra Serenità ne averà aviso.

196 In questo Consejo di X con la zonta, fu tolto do scriti a la balota a venir a Consejo con prestar a la Signoria ducati 100 per uno, da scontar in le angarie de uno anno in là, zoè sier Zuan Francesco Balbi di sier Piero, qu. sier Beneto, et sier Marco Antonio Corner qu. sier Zuan, qu. sier Antonio. *Item*, fu preso che sier Hironimo Justinian qu. sier Antonio savio a terra ferma, qual veniva in Pregadi, podestà per ducati 1000 dete, hora li vol e oferse prestar a la Signoria ducati 800 di contadi, con questo, tutti 1800 incorporadi possi scontar in cinque angarie che si meterà, et fu presa.

È da saper, ozi vene sier Nicolò Vendramin qu. sier Zacaria da Latisana, qual è stato soto Maran, e disciolto il campo nostro vene a Latisana. Dize in Maran è restà *solum* 150 boemi, et il capitano dil Golfo, sier Tomà Moro, resta con la sua fusta sola a Lignan et una barca longa e la galia Contarina, che aspeta de cambiar con la sotil.

Non voglio restar da scriver, come in questo tempo era poca carne in Becharia, *imo* le banche vuode, che più in questa guera non è stato. La caxon, perchè non si pol aver bo' di Hongaria; l'altra, perchè fuora de qui se vende la carne di manzo la lira soldi 2 e mezo, e qui la si vende 2 etc. Vedeli pur non sono; e si non fusse el pesse et le ove 2 al soldo, si staria mal.

Item, come è stà trovà molti carantani falsi, *adeo* per il Consejo di X fo terminato li officii non li togliano. Bezzi grandissima quantità si spende; ori non se trova alcun.

A dì 12. La matina, fo dito, per tempo, la nova venuta eri sera, hore 24, per *lettere di Padoa, di rectori, di hore...*, et una *dil provedador zeneral Contarini in campo*. Come erano venuti

alcuni, quali referivano, la cavalcata nostra andò contra i nimici passati la Brenta per andar a Citadela e Castel Franchò a depredar quanto trovavano, par che li nostri a Calvisan trovaseno essi inimici con la preda facta, e li fono a l'incontro, recuperò la preda et morti 80 di loro fanti, presi 20 et presi altri da 40 in 50 cavalli; il resto di inimici fuzino; si chè è stà vitoriosa la zornata.

Dil capitano zeneral fo lettere, questa matina zonte, date in campo a le Brentelle, di eri sera. Nara la cossa come andò, ch'el mandò per trovar i nimici, che haveano passato la Brenta, domino Mercurio Bua con Zorzi Busichio et cavali di stratioti..., et homeni d'arme, *videlicet* Malatesta Bajon, Zuan Batista da Fan, Julio Manfron, Zuan Paulo da Santo Anzolo, numero et Cola Moro con fanti..., et andati per trovar i nimici, quali erano 100 homeni d'arme, 300 cavali lizieri et 300 fanti, che havevano passato la Brenta e fato preda soto Citadela; de che a Calvisan, ch'è mia... vicino a Vicenza, trovati li nostri, si afrontono con i nimici, et fu preso, scrive, 100 cavali loro et fanti 300 tra morti e presi e malmenati; et recuperato la preda, sono tornati in campo con vitoria. Di nostri, morti do stratioti, ferito Marco da Zara da et Hironimo de Ungariis, da uno schiopo in la mano. *Item*, scrive aver ricevuto la lettera di la Signoria di la election de li do primarii a venir a veder l'exercito, li piace assai, et li aspeta con desiderio. *Item*, si mandi danari.

Fo leto una lettera di Franza, di 29, da Paris, drizata a domino Theodoro Triulzi, ch'è a Padoa. Come l'acordo con il re d'Ingaltera seguirà et sarà le noze. *Item*, che sguizari si voleno acordar con il Re; et parlando il Re con quelli capi, disse: « Come vole' vu acordarvi con mi, che non volete ch'io habi il Stato di Milan? » Et loro rispose: « Sire! Sarano contenti che l'habiate si siegue acordo, e di questo vojo meter la testa ». *Item*, che l'apontamento con Ingaltera è con assà meno danari, zoè si contenta di ducati 650 milia e do terre, Teroana e Tornai; con altre particolarità, sicome in dite lettere si contien.

Veneno sier Domenego Trivixan el cavalier procurator, e sier Lunardo Mozenigo, che eri fono electi andar dal signor Bartolomeo per consultar, per 15 zorni, e aceptono, con questo restino *solum* 15 zorni; si partirano damatina. Fo scritto a Padoa li trovi l'habitation loro nel vescoado; et con loro anderà secretario Vincenzo Guidoto stato *alias* con essi savii.

Vene l'orator di Hongaria a dimandar di questa